



REPUBLIKA E SHQIPËRISË

KOMISIONI I PAVARUR I KUALIFIKIMIT

Nr. 364 Akti

Nr. 511 Vendimi
Tiranë, më 18.2.2022

V E N D I M

Trupi gjykues i Komisionit të Pavarur të Kualifikimit, i përbërë nga:

Brunilda Bekteshi	Kryesuese
Suela Zhegu	Relatore
Firdes Shuli	Anëtare

asistuar gjatë procesit të vendimmarrjes nga sekretarja gjyqësore, znj. Etmonda Hoxha, në prani të vëzhguesit ndërkombëtar Gerrit Sprenger, në datën 18.2.2022, mori në shqyrtim mbi bazë dokumentesh çështjen që i përket subjektit të rivlerësimit:

SUBJEKTI I RIVLERËSIMIT: **Z. Roland Hysi**, ish-gjyqtar në Gjykatën e Rrethit Gjyqësor Fier.

BAZA LIGJORE: **Neni 179/b** i Kushtetutës së Republikës së Shqipërisë;
Ligji nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”;
Ligji nr. 96/2016, “Për statusin e gjyqtarëve dhe prokurorëve në Republikën e Shqipërisë”;
Ligji nr. 44/2015, “Kodi i Procedurave Administrative i Republikës së Shqipërisë”;
Vendimi nr. 78, datë 12.12.2017, i Gjykatës Kushtetuese.

TRUPI GJYKUES I KOMISIONIT TË PAVARUR TË KUALIFIKIMIT

pasi dëgjoi relatoren e çështjes, znj. Suela Zhegu, pasi shqyrtoi dhe analizoi shpjegimet dhe dokumentacionin e paraqitur nga Këshilli i Lartë Gjyqësor dhe pasi analizoi çështjen në tërësi, bazuar në vlerësimin tërësor të procedurave, sipas pikës 2, të nenit 4, të ligjit nr. 84/2016,

V Ë R E N:

I. RRETHANAT E ÇËSHTJES

1. Z. Roland Hysi është subjekt i rivlerësimit për shkak të funksionit të tij si gjyqtar në Gjykatën e Rrethit Gjyqësor Fier dhe bazuar në pikën 3, të nenit 179/b, të Kushtetutës së Republikës së Shqipërisë, në ligjin nr. 76/2016, datë 22.7.2016, “Për disa shtesa dhe ndryshime në ligjin nr. 8417, datë 21.10.1998, “Kushtetuta e Republikës së Shqipërisë”, të ndryshuar, dhe në ligjin nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë” (në vijim ligji nr. 84/2016), i është nënshtruar procesit të rivlerësimit *ex officio*.

2. Subjekti i rivlerësimit u është nënshtruar procedurave të rivlerësimit, pasi u përzgjodh me shortin e hedhur në datën 16.12.2019, në përputhje me rregulloren “Për procedurat e zhvillimit të shortit pranë Komisionit të Pavarur të Kualifikimit” (në vijim Komisioni).

3. Referuar nenit 14 të ligjit nr. 84/2016, procesi i rivlerësimit për subjektin ka filluar menjëherë me caktimin me short të trupit gjykues, me këtë përbërje: komisionere Suela Zhegu, me cilësinë e relatores dhe me cilësinë e anëtarit, komisionerët Firdes Shuli dhe Brunilda Bekteshi.

4. Menjëherë pas hedhjes së shortit u administruan raportet e vlerësimit të hartuara nga Inspektorati i Lartë i Deklarimit dhe Kontrollit të Pasurive dhe Konfliktit të Interesave (në vijim ILDKPKI) sipas neneve 31 - 33 të ligjit nr. 84/2016; nga Drejtoria e Sigurimit të Informacionit të Klasifikuar (në vijim DSIK) sipas neneve 34 - 39 të ligjit nr. 84/2016.

5. Trupi gjykues, në mbledhjen e datës 16.12.2019, ka caktuar me mirëkuptim kryesuesen e trupit gjykues znj. Brunilda Bekteshi, si dhe u deklarua mospasja e konfliktit të interesit nga ana e secilit prej anëtarëve të këtij trupi.

6. Relatori i çështjes, në bazë të neneve 33 dhe 39 të ligjit nr. 84/2016, ka administruar raportet e përpiluara nga ILDKPKI-ja dhe DSIK-ja.

7. Në zbatim të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, nga subjekti i rivlerësimit janë nisur procedurat e rivlerësimit:

- a) plotësimi dhe dërgimi i deklaratës së pasurisë sipas shtojcës 2 të ligjit nr. 84/2016, pranë ILDKPKI-së, brenda 30 ditëve nga data e hyrjes në fuqi e ligjit nr. 84/2016, sipas nenit 31;
- b) plotësimi dhe dërgimi i deklaratës për kontrollin e figurës sipas shtojcës 3 të ligjit nr. 84/2016, në DSIK, brenda 30 ditëve nga data e hyrjes në fuqi të ligjit nr. 84/2016, sipas nenit 35;
- c) plotësimi dhe dërgimi i formularit të vetëvlerësimit profesional sipas shtojcës 4 të ligjit nr. 84/2016, pranë organit të vlerësimit të aftësive profesionale, brenda 30 ditëve nga data e hyrjes në fuqi, sipas nenit 41 të ligjit nr. 84/2016.

8. Komisioni, me qëllim vlerësimin e të gjitha fakteve dhe rrethanave të nevojshme për subjektin e rivlerësimit Roland Hysi, me shkresën nr. ***, datë 4.11.2021, ka kërkuar informacion dhe dokumentacion mbi statusin aktual të subjektit të rivlerësimit pranë Këshillit të Lartë Gjyqësor (në vijim KLGJ).

9. KLGJ-ja, me shkresën nr. *** prot., datë 10.11.2021, ka dërguar dokumentacion të plotë, ndër të tjera, edhe kopje të vendimit nr. ***, datë 11.10.2021, të këtij institucioni, mbi

shkarkimin nga detyra të gjyqtarit Roland Hysi të Gjykatës së Rrethit Gjyqësor Fier, për shkak se është dënuar me vendim të formës së prerë për kryerjen e një krimi.

10. KLGJ-ja ka administruar vendimin me nr. **, datë 21.9.2020, të Gjykatës së Apelit për Krime të Rënda, i cili ka lënë në fuqi vendimin nr. **, datë 17.10.2019, të Gjykatës së Shkallës së Parë për Krimet e Rënda. Sipas këtyre akteve, z. Roland Hysi është deklaruar fajtor për kryerjen e veprës penale “korrupsion pasiv të gjyqtarit, prokurorit dhe funksionarëve të tjerë të organeve të drejtësisë”, parashikuar nga neni 319/ç i Kodit Penal. KLGJ-ja, bazuar në pikën 2, të nenit 140, të Kushtetutës së Republikës dhe në ligjin nr. 96/2016, “Për statusin e gjyqtarëve dhe prokurorëve në Republikën e Shqipërisë”, pasi ka evidentuar se vendimi penal i dënimit ka marrë formë të prerë, ka vendosur të shkarkojë nga detyra gjyqtarin Roland Hysi, për shkak se është dënuar me një vendim të formës së prerë për kryerjen e një krimi.

11. Kushtetuta e Republikës së Shqipërisë, në pikën 2/b të nenit 140, përcakton në mënyrë taksative se gjyqtari shkarkohet nga detyra, ndër të tjera, edhe kur është dënuar me vendim të formës së prerë për kryerjen e një krimi.

12. Gjykata Kushtetuese, me shkresën nr. *** prot., datë 15.2.2022, informon se në regjistrin e çështjeve për ankimet në kuadër të juridiksionit disiplinor të Kolegjit të Posaçëm të Apelimit nuk është regjistruar ankim nga z. Roland Hysi kundër vendimit nr. ***, datë 11.10.2021, të KLGJ-së për shkarkimin e tij nga detyra.

II. ARSYET PËR PËRFUNDIMIN E PROCESIT TË RIVLERËSIMIT

13. Procesi i rivlerësimit që kryhet nga Komisioni i Pavarur i Kualifikimit është një proces kushtetues, që mbështetet në nenin 179/b dhe në Aneksin e Kushtetutës, si dhe në ligjin nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.

14. Trupi gjykues konstaton se z. Roland Hysi ka qenë me funksion gjyqtar pranë Gjykatës së Rrethit Gjyqësor Fier, duke qenë kështu në rrethin e subjekteve të rivlerësimit që i nënshtrohen procesit të rivlerësimit *ex officio*.

15. Në referim të germës “ç”, të pikës 1, të nenit 64, të ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”, ndër të tjera, përcaktohet se: “*Statusi i magjistratit mbaron në rastet kur shkarkohet nga funksioni*”.

16. Trupi gjykues, pasi u njoh me vendimin nr. ***, datë 11.10.2021, të KLGJ-së, për shkarkimin nga detyra të gjyqtarit Roland Hysi të Gjykatës së Rrethit Gjyqësor Fier, për shkak të një dënimi penal të formës së prerë, si dhe me shkresën me nr. ***, datë 15.2.2022, të Gjykatës Kushtetuese, Kolegji i Posaçëm i Apelimit informohet se subjekti i rivlerësimit nuk ka paraqitur ankim ndaj vendimit nr. ***, datë 11.10.2021, të KLGJ-së, ka konstatuar se subjekti i rivlerësimit Roland Hysi ka humbur statusin e magjistratit.

17. Trupi gjykues ka arritur në përfundimin se mbarimi i statusit të magjistratit sjell si pasojë përfundimin e kësaj procedure administrative pa një vendim përfundimtar për çështjen.

18. Neni 95 i Kodit të Procedurave Administrative ka parashikuar për pamundësinë në objekt apo qëllim: “*Organi publik deklaron të përfunduar procedurën administrative pa një vendim përfundimtar për çështjen, kur objekti për të cilin kishte nisur procedura apo qëllimi i tij është bërë i pamundur*”.

19. Në zbatim të kësaj dispozite, për faktin që subjekti i rivlerësimit nuk gëzon statusin e magjistratit, trupi gjykues vlerëson të përfundojë procesin e rivlerësimit kalimtar për z. Roland Hysi, pa një vendim përfundimtar.

PËR KËTO ARSYE,

Trupi gjykues i Komisionit të Pavarur të Kualifikimit, mbështetur në pikën 6, të nenit 4, të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, në pikën 2/b, të nenit 140, të Kushtetutës së Republikës së Shqipërisë, në germën “ç”, të pikës 1, të nenit 64, të ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”, si dhe në nenin 95 të Kodit të Procedurave Administrative, i ndryshuar.

V E N D O S I:

1. Të deklarojë të përfunduar procesin e rivlerësimit kalimtar të subjektit të rivlerësimit Roland Hysi, pa një vendim përfundimtar, për shkak se subjekti i rivlerësimit ka humbur statusin e magjistratit.
2. Ky vendim i njoftohet subjektit të rivlerësimit, Komisionerit Publik dhe vëzhguesve ndërkombëtarë, si dhe publikohet në faqen zyrtare të Komisionit, në përputhje me pikën 7, të nenit 55, të ligjit nr. 84/2016.
3. Kundër këtij vendimi lejohet ankim në Kolegjin e Posaçëm të Apelit brenda 15 ditëve nga data e njoftimit të tij.
4. Ankimi depozitohet në Komisionin e Pavarur të Kualifikimit.

U shpall në Tiranë, në datën 18.2.2022.

ANËTARËT E TRUPIT GJYKUES

Brunilda BEKTESHI
Kryesuese

Suela ZHEGU
Relatore

Firdes SHULI
Anëtare

Sekretare gjyqësore
Etmonda Hoxha